



Kalaallit Nunaanni pinerluttulerinermi Inatsisip aamma Kalaallit Nunaanni eqqartuussisarnermik inatsisip allanngortinneqarnissaat pillugit inatsisissatut siunnersuummut missingiutip (Nuummi inissiisarfimmi kinguaassiuutitigut pinerluuteqarsimasut katsorsarneqarnissaannut inissanik pilersitsineq. Ukiukitsunik pinngitsaaliilluni atoqateqarsimasoqartillugu pineqaatissiissutit sakkortusineqarnerat, inissiisarfimmi imigassamik aanngajaarniutinillu atuinnginnissamut suliniutit, nikanarsaataasumik ajuallatsitaarujussuarnermi eqqunngitsuliorfigineqartoq suliassanngortitsinngikkaluartoq unnerluussisussaataasaasut pineqaatissiinertaqanngikkallartumik unnerluussisussaataitanerat, inatsisit unioqqutillugit aningaasatigut iluanaaruteqartarnerp pinerluutinngortinnera, iluanaarutinik arsaarinnissinnaanerup annertusinera, aamma nakkutigineqartussanngorluni eqqartuunneqarnermut atatillugu tarnip pissusaanik ilisimasalimmit katsorsarneqarnissamut peqquneqarneq) Kalaallit Nunaanni Namminersorlutik Oqartussanit akuersissutigineqarnissaa pillugu Inatsisartut aalajangiiffigisassaattut siunnersut.

(Ineqarnermut, Attaveqarnermut, Aatsitassanut, Inatsisit Atuutsinneqarneranut Naligiissitaanermullu Naalakkersuisoq).

(Siullermeerneqarnera)

Nuanneqaaq, eqqartuussisarnermik inatsisip ukiut kingullit isumaqatigiissutigisagut malillugit, nunatut inuiaqatigiittullu meeqqat inuusuttullu 18-nit inorlugit ukiullit pinngitsaalisamik atoqatigineqarnerannut pineqaatissiinerit sukaterneqarnissaannut isumaqatigiissutigisimasagut, pisariaqartumik maanna allannguuteqartinneqarnissaannut siunnersuummik saqqummiisoqarmat. Taakku saniatigut siunnersuut eqqartuussisarnermik inatsimmi allannguutissanik arlalinnik imaqartoq, eqqumaffissanik annertusaasussaq tassumalu eqqartuunneqarsimasunut suliniutinut aammalu inissiisarfinniittut periarfissaannut.

Isertugaataangilaq, uagut Demokraatiniit eqqartuussisarnermik inatsisip suli sakkortuseqqinnissaa kissaatigigatsigu pinerluttuliorfigitissimasut annertunermik naapertuilluartumik pineqarnerunissaat qulakkeerniarlugu. Tamanna inuiaqatigiinni toqqisisimanermik annerusumik pilersitsissasoq upperaarput. Meeqqat toqqissisimanissaannut illersorneqarnissaannullu ataatsimut akisussaassuseqarnitsinnut isummatta tapersorsorneqarnerulernera malugisimavarput. Inuiaqatigiittut inuttullu ataasiakkaatut sapinngisarput malillugu pinaveersaartissavarput, meerartatta inuusuttortattalu ajortumik pineqannginnissaat. Tamannalu aamma naapertuuppoq isummerfigisassatut siunnersuutinut allanut, ukiaanerani ataatsimiinitsinni Inatsisartunut ilaasortat saqqummiussaannut.

Inatsisunik suliaqarnerput suli naammassinngilaq. Innuttaasunik peqqissunik nukittuunillu pilersitsissaagut. Taamaattumillu akisussaaffigaarput innuttaasunut kajumissaaruteqarnissarput inatsisunik unioqqutitsinermut pinerluttuliortarnernullu suugaluartunut pinaveersaartitsinissamut pisariaqartumik akisussaaqataanissaannik – pingaartumik meerartatta illersornissaat pineqartillugit. Isumaqaanngilaq, oqaasinngortitsiinnassagutta inatsisunik nutaanik atulersitsissagutta sulianut pingaartunut inuiaqatigiit akuutinnagit. Ingeerlatitseqqiinerup attaveqatigiinnerullu ataatsimoorussamik suleqatigiinnermik



pilersitsinissaq qulakkiissavaa, taamatullu inuiaqatigiinnik peqqinnerusunik nukittunerusunillu pilersitseqataasimasutut misiginermik kinguneqassalluni.

Demokraatit allannguutissatut siunnersuutigineqartut isumaqatigaat, pingaartumilli ersarissarusullugu, iluarisimaaratsigu, meeqqat inuusuttullu illersorneqarnissaannut tunngasortaa. Taamatullu aamma iluarisimaarparput, meeqqanut inuusuttunullu amiilaarnartumik pinerluuteqartartut ullumernit sakkortunerusumik pineqaatissinneqartarnissaat iluarisimaaratsigu. Demokraatit isumaat malinneqassagaluarpat sulii sakkortunermik pinerluuteqarsimasut pineqaatissinneqartassagaluarput, isumaqarpugullu Inatsisinut ataatsimiititaliap isumaliuutissiisummini tamanna isiginiartariaqaraa.

Taamatut oqaaseqaateqarluta siunnersuutip Inatsisinut ataatsimiititaliamut suliareqqitassanngorlugu ingerlateqqinneqarnissaa innersuupparput, siunnersuutip imarisaata sukumiisumik paasilluarneqarnissaanik kissaateqarluta aammalu pinerluffigitissimasut inatsisitigut illersugaanerisa qulaajarneqarnissaat kissaatigalutigu. Minnerunngitsumik, suliniutit ersarissumik inuiaqatigiinnut saqqummiunneqarnissaat annertuumik pinaveersaartitsinissap siunertaa anguniarlugu.